

Banner decorativo di doble lustro lo keda exponi henter aña

Henter e aña lo keda organiza eventonan conmemorando nos 30 aña di Himno y Bandera mas 20 aña di Status Aparte

STA. CRUZ--Tur caminda por mira e bannernan. Tur caminda hende ta papia riba nan. Tur caminda nan ta lanta e sentimentonan di patriotismo cerca nos



hendenan. Pa bishitantenan e bannernan colorido cu ta domando palonan di luz rond nos isla, no unicamente ta bunita pero ta invita turistanan pa puntra y siña mas di nos isla, su tradicion y historia. E bannernan conmemorando e doble lustro di 30 aña di nos Himno y Bandera mas 20 aña di nos Status Aparte ta dunando un resultado hopi positivo. E iniciativa inovativo aki, carga pa Comision 50 en cooperacion estrecho cu Ministerio di Cultura y Comision Celebracion Dianan Nacional y D.O.W., ta muestra con sector publico y sector priva por coopera hunto integrando cultura den promocion turistico y comercial, produciendo asina un mihor producto pa pais Aruba. E iniciativa

aki, ta patrocina casi den su totalidad pa sector priva, por mira e cantidad di empresanan riba e bannernan, mientras cu gobierno di su parti ta coopera cu permisonan necesario y e tempo di empleadonan pa instalacion di e bannernan. Cooperando cu otro, a resulta den mas di 250 banner colorido, decorativo y festivo rond di nos isla. Esakinan a resulta asina impresionante cu ainda tin barionan cu ta yama pidi pa pone banner den nan bario, mientras cu tin comerciante cu tambe ta desea avor di ta participa den e celebracion. Biento ta un factor limitante cu a causa cierto contratiempo inespera, pero ta studiando con pa coregi esaki. Un peticion ta bay pa publico en general pa yuda cuida e



bannernan cual lo keda colga te cu e ultimo celebracion di e doble lustro, cual ta proyecta pa 12 di Oktober, Dia de la Rasa caminda den forma multicultural lo celebra e cordialidad di tur e hendenan di nos isla. Un palabra di danki ta bay na tur comerciante cu a participa den e proyecto di banner aki, cooperando y invirtiendo den esaki. Un danki particular ta bay na DOW y ELMAR pa

nan cooperacion estrecho. Sin esaki, ningun banner lo ta na halto awe. Aruba henter ban celebra henter e aña di doble lustro aki unda nos ta celebra 30 aña di nos simbolonan di union y identidad. 20 aña di Status Aparte ta un comienzo y ta hunto nos lo mester sali na vanguardia di nos pais. Nos Escudo, Himno y Bandera ta surpasa cualkier interes particular y ta di nos nan ta.